

安徽历代方志丛书

泾县志

(下册)

(清·嘉庆)

洪亮吉 总纂
李德淦 主修

泾县地方志办公室 整理

黄山书社

阅

K295.4
2011
2

安徽历代方志丛书

(清·嘉庆)


洪亮吉
李德淦

纂修

泾县志

汪渭
童果夫
点校

下册



泾县地方志办公室

黄山书社

卷十六 名宦

昔之仕宦而俎豆一方者：如楚期思之孙权敖，魏邳县之西门豹，汉桐乡之朱邑，三国时，魏寿春之时苗，其存，则尸祝之；卒，或留葬其地，盖惠泽之在人心，不以今昔异也。县之名宦，如吴、陈焦，晋、桓彝，生官此方，歿即营冢于此。千余年来，岁时伏腊，父老禱祀不绝，非即其明效大验欤？其它若何琦、李善、王祿、苏济、刘鸿盘诸人，或以文教显，或以武功着，均无愧于庙食者也。近今则王廷栋、江恂等亦实心为政，因并列焉，撰名宦传一卷。

吴

陈焦为泾邑长，兴水利，布善政，卒于官。葬桃花潭北，邑人立祠祀之。《钱志》

按：泾旧志，多沿陈焦更生之说，增饰附会，至云：葬后七日，穿土化为小儿，坐于墓上，久而不见。《钱志》颇辨其诬。然焦为泾邑长，亦《吴志》所未载也。

晋

桓彝字茂伦，谯国龙亢人。性通朗，早获盛名，有人伦识鉴。明帝时，为散骑常侍，以功封万宁县男。丹阳尹温峤上言：“宣城阻山带川，频经变乱，宜得望实居之，窃谓桓彝可充其选。”帝手诏曰：“适得太真表如此，今大事新定，朝廷须才，不有君子，其能国乎！”方今外务差轻，欲停此事。彝上疏深自撙挹，内外之任，并非所堪，但以坟柏在此郡，欲暂结名义。遂补彝宣城内史。苏峻之乱，彝纠合义众，欲赴朝廷。其长史禅

惠以郡兵寡弱，山人易扰，可按甲以须后举。彝厉色曰：“夫见无礼于其君者，若鹰鹯之逐鸟雀。今社稷危逼，义无宴安。”乃遣将军朱绰讨贼，别帅于芜湖破之。彝寻出石碓，会朝廷遣将军司马流先据慈湖，为贼所破，遂长驱径进。彝以郡无坚城，遂退据广德，寻王师败绩，彝闻而慷慨流涕，进屯泾县。时州郡多遣使降峻，裨惠又劝彝伪与通和，以纾交至之祸。彝曰：“吾受国厚恩，义当致死，焉能忍垢蒙辱，与丑逆通问，如其不济，此则命也。”遣将军俞纵守兰石，峻遣将韩晃攻之，纵败死。晃因进军攻彝，彝固守经年，势孤力屈。贼曰：“彝若降者，当待以优礼。”将士多劝彝伪降，更思后举。彝不从，辞气壮烈，志节不挠，城陷，为晃所害，年五十三。时贼尚未平，诸子并流迸。宣城人纪世和率义故葬之。贼平，追赠廷尉。谥曰“简”。咸安中，改赠太常。《晋书·本传》

钟 雅 字彦胄。颍川长社人。补宣城内史。钱凤作逆，加广武将军，率众屯青弋。时广德县人周玘为凤起兵，攻雅，雅退据泾县，收合士庶讨玘斩之，凤平，征拜尚书左丞。及苏峻逼迁车驾，为贼所害。追赠光禄勋。《晋书·本传》

何 琦 字万伦，灊人。司空充之从兄也。年十四，丧父，哀毁过礼。性沉敏，有识度，好古博学。居于宣城阳谷县。事母孜孜，朝夕色养，常患甘鲜不赡。乃为郡主簿，察孝廉除郎中，以选补宣城泾县令。司徒王导引为参军，不就。及丁母忧，居丧泣血，杖而后起。停柩在殡，为邻火所逼，烟焰已交，家乏僮使，计无从出，乃匍匐抚棺号哭，俄而，风止火息，堂屋一间免烧，其精诚所感如此。服阕养志，衡门不交人事，耽玩典籍，以琴书自娱。不营产业，节俭寡欲，丰约与乡邻。其之司空陆玩，太尉桓温并辟命，皆不就，诏征博士，又不起。简文帝时为抚军钦其名行，召为参军，固辞以疾。公车再征通直散骑侍郎散骑常侍，不行。桓温常登琦县界山，喟然叹曰：“此山南有人焉，何公真止足者也。”琦布褐蔬食，恒以述作为事，着《三国评论》，凡所撰录百许篇，皆行于世。年八十二卒。《晋书·本传》

唐

李善 扬州江都人。有雅行，淹贯古今，不能属辞，故人号书簏。显庆中，累擢崇贤馆直学士，兼沛王侍读。为《文选》注，敷析渊洽，表上之，赐赉颇渥。除潞王府记室参军，为泾城令。坐与贺兰敏之善，流姚州，遇赦，还居沭、郑间。讲授诸生，四远传其业，号文选学。《唐书·文艺·李邕传》

李孝偶 天宝中，由太平今徙泾。行温而恭，政清而简，不矫激以干誉，不严厉以临下，士民怀之。卒于泾，子孙家焉。广德初，群盗蜂起，频陷城邑入泾，独聚而保公之庐，且曰：无忘公之德也。招讨使袁修以状闻，诏赠宣州刺史。陈简甫《开元良吏记》

裴焊 太和元年旧志作永泰中，为泾令。刚正慈惠，民怀其德，塑像萧王行祠及灵惠庙祀之。《钱志》

韦焕 京兆人。有文学，为尉时，以慈惠称。既去，民塑像于灵惠庙侑食焉。《顺治志》

南唐

吴光辅 保大中，以尚书郎为宣州推官，兼知泾县。更新学校，崇奖儒风。《顺治志》

宋

刘谊 字宜翁或作公曼，长兴人。中丙科，熙宁三年，为泾尉，痛绳豪恶。既去而民思之。后以论新法谪，隐居三茅山。《顺治志》

马子云 举孝廉。为泾尉，充本郡租纲运米，至淮遇风，舡溺，失米万斛余，子云被系，五年遇赦得出。因隐于南陵山中，每日止一蔬饭，后卒于泾。《成化志》

旧《府志》唐、宋并载，误，今从《成化志》入宋。《钱志》

赵不吝 太宗六世孙。绍兴间，为泾丞。有平俞一功，除德化县令，卒于任。赠朝议大夫，谥简静。子善惠，扶柩归葬水西，子孙家于泾。《宋史·宗室世系表》 旧《府志》 《顺治志》

魏 杞 字南夫。寿春人。唐魏郑公之后。绍兴中，以奉议郎知泾县，有惠政，罢无名科费。太平、繁昌二县共获盗，宰尉希功赏，日加锻炼。贼诬引泾民受寄贼物，至檄取五十三家。杞闻，驰檄取审，悉纵诸被诬者。在任六年，从臣钱端荐其才，召对擢太府寺簿，官至左仆射兼枢密使。《宋史》本传 《江南通志》

林 淳 干道八午，以嘉议郎，知泾县。甫至，首访三农利病。邑有陈、雷二古塘，湮塞不理，积为豪家公据，淳议复之。明年，榜示乡户，修复古塘，凡六百余所，民大称惠。《顺治志》

王 泳 字叔永，濡须人。嘉定三年，以宣教郎，知泾县。初，县治有水患，泳迁建于赏溪东之留村，民莫厥居，修废举坠，良吏称最。《文献通考》 《江南通志》

元

塔 出 为泾县达鲁花赤，克己奉公，民情悦服，任满，民立去思碑。《成化志》

按：《嘉靖志》、《顺治志》、《钱志》，俱作答出。今据元程栗《修学记》，为塔出。又《钱志》云：《成化志》作塔出，则其误始于《嘉靖志》也。

施正大 号清泉，泾县白塔里人。至元间，丞相伯颜下江南，辟知本县，与达鲁花赤发黑协恭赞治，民安其生。初，县治在水西，时苦漂荡，正大始徙治于水东敬天坊，迄今赖之。又与后令协谋复学舍。复学为朱文魁事，时正大兄弟以邑绅协谋，购田易地。旧志指为正大为令时事，非，见《文魁传》及《记》。子洁堂，隐居不仕。《钱志》

朱文魁 字晦叔，号梦梅。至元间，由国子生为泾尹。泾学舍本大安寺基，至元己丑，寺僧谋复故址，擒辱教官，弃圣像于

水，率其徒踞之。文魁使教谕贺桂孙赴诉于提刑案察使高睿。前邑令施正大购田十五亩，桂孙复益以五亩易僧地，复建今学宫，即其地也。庚寅，黄、朱二宣慰讨贼石门乡，文魁以身庇民，民无兵扰。在任六年以惠称。濒行，有《别父老》及山川诸诗曰《野获稿》。桂孙字影月，邑张香都人。性孝，工文艺，由荐为教谕。《嘉靖志》

苏 济 字汝舟。益都人。至正初，以承务郎为泾尹。练达章程，浚渠均赋，修县治、学宫，铸祭器，复浮屠氏侵田，以饷诸生。百姓歌曰：“四民艺业通，县官有苏公。”又曰：“三载民无忧，赖有苏汝舟。”《梅震苏公德政记》

申仲礼 为令有惠政，奉公恤民。秩满去，后复为宁国路推官。《嘉靖志》

吕良佐 字唐臣。为泾尹。仁慈廉干，雅以诚信抚民，擢监察御史，仕终廉访使。《嘉靖志》

刘 晟 字正卿。为泾尹，奉公守法，长于吏事。邑之条章，皆定于晟。《嘉靖志》

李 俨 字端伯。为泾尹，温良廉谨，以才能称。任三载，民怀惠焉。孙孜《成化志》作攻复为泾主簿。《嘉靖志》

马 晋 字叔昭。由国子生为泾尹。温厚廉干。儒书、吏律、农商技艺之业，皆兼通。兴学校，建县庭，在任五年，民甚戴之。《嘉靖志》

王 相 字吾素。庐陵人。由翰林编修出为尹，首核民田，以见年为准，禁兼并，平赋役。江东宪司派额外之征，相令民告免，民甚德之。时主簿杜继良，称勤干，核田均赋，与有绩焉。《嘉靖志》

明

李 荣 淮西人。洪武元年，知县事。抑强扶弱，劝农桑、兴学校、秩满、迁兴安府通判。从《嘉靖志》

沈士民 应天人。洪武时，知泾县，赋征均平。仅二年，民皆悦服。《顺治志》

杜博闻 《成化志》作文。字景预，山西陵川人。由贡生知泾县，果敢有为。尝以“公勤廉俭”四字铭坐隅以自警。《嘉靖志》

杨忠立 《成化志》、旧《府志》作杨立。河南洧川人。由监生知泾县，增修学校，奖劝士类。时称廉静。迁庆远府通判。《嘉靖志》

向铭仲 《成化志》作向铭、旧《府志》作敏仲。四川人。由人材知泾县，廉洁无私，礼贤下士，赋役均平，而民不扰。后致仕去。《顺治志》

胡维几 字彦民，南直定远人。洪武初，为泾丞。归附之初，开创县治，招徕流离，造公廨，修学校起废扶衰，渐有条理。二年卒于官。其妻汤氏，子均宝，遂居于泾，入籍东隅。《顺治志》、《钱志》

荀玉珍 字器之。南直隶凤阳人。先任民兵万户府经历，以能干称。洪武间，改丞泾县，慈祥恺悌，人心悦服。召为都督府都事，旧《府志》作经历。迁松江知府。《成化志》作永乐戊戌任。《钱志》

秦闻民 无为州人。洪武初，任泾丞，抚辑新附，有惠政，民皆德之。遵例入籍。《顺治志》

童执中 怀远人。洪武初，任成都知府，坐军饷不给，谪幕于泾，卜居赏溪之上。名其子曰“泾川”。后举人材，仕武清知县。《顺治志》

任继先 字敬宗，西安府人。丞泾县，果敢任事，迁仙居知县。《顺治志》

祝敏安 江西鄱阳人。由人材丞泾县，廉洁勤劳。秩满，迁武平知县。《顺治志》

陈安 浙江会稽人。由进士为教谕，性行倜傥，问学渊博，善启迪人。迁黄冈知县。《顺治志》

徐子玉 浙江东阳人。由进士知泾县，明达有方略，后迁知州。《顺治志》

陈杞 福建宁德人。永乐初。由乡魁为教谕，才能学识推重于时。教士有声，擢兵科给事中。《顺治志》

薛 惠 《成化志》作公惠。北直隶魏县人。永乐九年，以监生知泾县。刚毅有为，凡奉上檄催督，应之绰然。减无艺科敛，遇俗有赛神者，禁之曰：“此褻神也。”修文庙兴士类，合邑德之。《嘉靖志》

闵 珪 《成化志》作桂。江西建昌或作建康，非。人。宣德五年，丞泾县，慈爱廉平，不假桁杨，而民自感服。修葺县治、坛宇逾年，丁外艰去。《嘉靖志》

刘 恒 字常吉，江西吉水人。正统中，以贡士为泾县教谕。素攻经学，勤于课士，沐其教者，多获隼。修建学宫，不烦有司。迁襄阳教授，转国子监助教，终翰林院检讨。《顺治志》

王 凤 北直隶任丘人。景泰三年，典史时，旌德知县曹祥署县事，喜营缮，凡学校、桥梁、庙宇无不修葺，实藉凤悉心为之经理。《钱志》

强 珍 字廷贵，北直隶沧州人。成化四年，以进士知泾县。廉慎不受私谒，才识通敏，屡决疑狱。复屯军侵田，定两厘凋耗之税，请减额赋，民德之。举贤令者，必首珍焉。三年，擢御史，历官南京右通政。《明史·本传》 《嘉靖志》

按：珍本传，作成化二年知泾县，泾旧志据成化六年《修学记》，为四年，今从之。

王 弁 字士《成化志》作世瞻。江西吉水人。成化十年，由进士知泾县，为政恺悌，兴利除害，举废扶衰，有古循吏风。值岁歉，请当道蠲贷，不得，乃自疏诸朝，民赖以苏。自奉极俭，妻子皆粗衣粝食。三年，擢监察御史，行李萧然。《嘉靖志》

王 浚 字文深，河南商水人。登进士。成化十年，以御史谪泾县丞，时县事久弛，慨然为已任。锄强植弱，兴学校，均赋役，通钱法。凡坛壝公廨，桥梁铺舍，多所修建，身如冰立，吏卒凜然。《顺治志》 《江南通志》

李 时 字维中，四川成都人。成化二十年，由进士知泾县，承王浚兴作之后，镇以和静，民赖以安。重学校，建明伦堂。岁早虔祷，辄有应。迁工部主事，民勒石志思。《嘉靖志》

陈 宾 广东香山人。由监生授泾训导，适文庙颓败，有司

漫不加意。提学御史王鉴之饬其修理，土木之料无措，宾率诸生募构，遂极壮丽，工成，忌者以毁言罢斥。《顺治志》

包羲民 广东合浦人。宏治四年，由进士知泾县，沉静宽绰，有冰檠之操，吏亦不能为奸，里人争讼，温语解之。雅不喜饬厨传以媚上官，尤近世所难。《嘉靖志》

陈垣 字子崇，浙江临海人。弘治八年，由贡士为泾县教谕，文行并懋，端己范士。盛暑燕坐，必整衣冠。却岁时常仪，有不可却者，储以修饰庙学，自奉菲，周嫠士弗吝。迁助教，士大夫攀送数十里，不忍舍，立遗爱碑于学宫。《顺治志》

南京国子监司业罗钦顺记曰：今天下以贤以道得民者，累千百人，其名盛矣；至于相与之隆，有相得之实，无愧乎其名者，盖寥寥焉，固予所见闻者狭。然近时宪臣祇若明诏所称贤师儒，无过十数人，天下之大，势亦不能无遗，然益以见其实之为难能，其名之为难称也。兹十数者，皆迁教国子，其一是为临海陈君子崇，初领浙江乡书，再上春官不第，卒业太学，名附铨曹籍矣。以母老急于禄养，得教谕宁国府之泾。子崇学行醇笃，其教人先身心而后词藻，谨言动，正礼节，虽盛寒暑，必衣冠坐讲堂，谆谆诲诱，竟日忘倦。尤严于取予，凡生徒见献，若有司赠遗，虽以礼，亦必固辞，有不获辞，则以饰学宫，新祭器，至斥俸余以补其不足。谢司训举家疫疠，子崇躬护视，不以为嫌。谢竟卒，殓殓周详。而抚助其家人，恩意备至。泾先辈若王宪副着、程侍御富，皆有名德，子崇白于当道，为祠祀之。凡可以风厉士心者，罔不加意，一时及门之士，皆勃然有所兴起，争先磨濯，驯改旧观。学故有田附墉九亩，久入于豪家，子崇复之有方，不大声色。于邑民有争辨者，或不至有司，往往就直子崇，其敬仰爱慕，不独诸生然也。其入为国子助教也，泾之人士欲挽留不可，相与连数十舟累驿，怀不能已，又相与谋刻石于学，以永其传，子崇之得名，其可谓有其实矣。石既具，乃推王生大韶、张生霞来，因子崇乡友大行人秦君从简请文于余，余所谓愧有其名者，何文之能为？虽然，师道之不立也久矣，诚得如子崇十百辈分布中外，相与协心并力，以振其微，而为之弟子者，所

以相信、相亲，至于久远，而不忘其教，皆若泾人士之于子崇，则人材之盛，风俗之美，庶乎其可望矣。以今师儒之众，其贤余既不得而悉闻，所闻如子崇；其又可隐，故为记其行事俾刻焉。使凡闻子崇与泾人士之风者，皆将有所感也。子崇名垣。其先君子为乡耆儒，不及官而卒。子崇之贤，要为有自其方来事业未可量云。正德丁卯长至日。

李鸾 字天瑞，北直隶固安人，登进士。弘治十年，《顺治志》作正德。由御史谪知泾县，吏材明决，邻邑讼多就质。建尊经阁谯楼，桓简公祠，置义冢掩骸埋胔，造浮艘济上下坊渡，诸所缮举甚众。迁知和州。《江南通志》 《钱志》

彭流 字汝清，江西鄱阳人。弘治十六年，由贡士任教谕，诚恣待士，取予不苟，虽盛怒无疾言遽色，泾士德之。六年迁兴化教授。《顺治志》

贾启 字启之，湖广黄冈人。正德六年，由进士知泾县，为政严明，旁通六艺，邑虽烦剧而讼庭常闲，民有官清吏废之谣，寻擢御史。《顺治志》

郑气 字浩然，北直隶静海人。正德甲戌进士。十一年，知泾县，坦易明敏，吏不敢欺。凡事存大体，不务苛刻，清正之节，与贾并称，擢御史。《顺治志》

胡永成 字思贞，号巖泉，江西安福人。嘉靖九年，由进士知泾县，明敏果断，盗贼敛迹。他邑有讼不决者，必属谳。奖励英俊，清里籍，祛蠹弊。积谷万余石，岁侵赖以赈给。邑人有《去思碑》并《赈泾图》纪其事。《江南通志》 《钱志》

左铤《巖泉胡公去思碑记》略曰：明嘉靖乙未秋八月，泾令胡公以秋官主事擢去。明年丙申春，天子敷锡类之仁，余承乏南使，紆道省觐，泾之人丁壮号哭，老人儿啼，曰：“胡公弃我去矣！”吾亦不敢私君子之泽于一方，宜列治行，伐石勒文，著吾人之不敢忘公，为来者劝。初，庚寅岁，公以己丑进士来知泾事，泾依山据险，素称难治，公帅身居正，作约法十章以先之，暇则进学宫，弟子讲解文义已，又辟养正堂一所，以为养蒙敛才之地。邑人慕循其教，遂以文辞显于世。由公广其化，立捕盗

法，至盗有受捕者，公廉得其情，垂涕泣道之，故盗贼日少。且善以儒术饰吏事。敷决疑狱，所在愧服，无敢辄逃匿。邻境闻之有讼不决者，必言上官，愿属胡令，而上官亦曰：“非胡令莫能办此。”由是受委无虚日，而公亦往往称任使。尝愤田粮之不清，而储蓄之无备也，乃为究正则例，尽革宿弊，而随宜区画，二三年间，粟入以百万计，民卒赖以全活。又改设南陵水，次仓于湾址，军民便之。他如屏吏奸，剔政蠹，还浮屠，禁止嫁娶送终奢靡，务出于俭约。至救荒一政，虽富彥国，朱元晦无以远过，故不令而民从其化，近者视而效之，远者四望而法之。第公性伉直，无所阿避，且乐与人善，见不善则疾若仇敌。又泾承久敝之余，令弛民玩，一旦绳之以法，奸民不堪，然公坚白之守，莫可磷缁，兼以实誉著闻，当道交章论荐，乃有今命。去之日，追而送之者数百人，或乃留衣服为别。未逾年，复相与思公，图所以志不朽，天理之在人心，其不容泯灭如此。天下之事，积久则征，论定则明，顾明者能察其终始耳！余因此历考令吾泾者，自吾有识以来，凡十一人；其间循良可纪者四人，正德辛未贾公启，实令是邑。已乃郑公气继之，越二十余年，公始来视事已，又陈公守仁继之，天幸惠吾氓，获是多贤。泾之谣曰：“前有贾郑，后有胡、陈，诂不信然！”昔开元中，未三纪，吾宣得良吏六人，吏以为美谈，以今况古，良用忻慰，书其事以劝来者，岂过哉！石树于通津门之十字街，上覆以亭。倡其事者，义民赵鹤、王钥、赵七、王禄等若干人，既记以文，复系以诗，曰：帝奠八荒，适用大康。凡泾之民，孰非天氓。历载以来，伊谁究思。邑居弗宁，若坠若遗。惟明天子，克慎厥使。我公来官，神人胥喜。士曰吾师，斯文在兹。有弗祇若，惧公闻知。民曰吾父，以抚以循。若不化服，我则非人。嘉气氤氲，合为大同。神应祥福，物效亨丰。惟泾之陋，既沾既足。胡不均被，俾秉枢轴。公来何迟？公去何速！我欲留公，天子不可。有亭岌岌，有石穹窿。刻字其上，匪我私公。惟民怀德，惟天助顺。天子万年，公多受庆。

陈守仁 号我山，江西德化人。嘉靖十四年，由举人知泾

县，有清操，崇尚风教，着《谕民集训》，示民古礼，又书联句于座右云：“眼前皆赤子，头上有青天。”以艰去，赠赈悉不受，至中途鬻衣以行。《顺治志》

钟 纽 号东岑，江西永丰人。嘉靖二十六年，由举人知泾县，政崇宽简，大揭“节爱”二字于退省堂，清节始终如一。尝捐俸甃黄泥冈路十里，造下坊渡浮桥。调任去，民有遗思。《顺治志》 《江南通志》

邱时庸 号东园，福建漳浦人。嘉靖二十九年，由举人知泾县。精劝惩，奸盗屏息。修县志，并水西精舍。《钱志》

朱 甫 字子美，浙江崇德今浙江石门县人。由歙县训道，迁泾县教谕，端严持重，教士先德行，后文艺。尝捐俸给诸生之不给者，学宫有“去思碑”，邑人王廷干记。《顺治志》

陈思敬 号南阳，福建惠安人。**屠 巨** 号洪溪，浙江嘉兴人。俱由岁贡生任训道。思敬博学严正，巨真诚淳笃，并以良师称。《顺治志》

刘世亨 字以进，江西临川人。嘉靖四十五年，由进士知泾县。勤化导，严法纪，省费均徭，置学田以赡士。以优异征，士民泣送至采石者数千人。后二年，民思之为立祠。《顺治志》
《江南通志》

杨孟春 山东新泰人。嘉靖四十五年，由岁贡生为主簿，却里役例馈，自甘蔬食。鞫狱平允，不枉法媚人，尝条陈十二事于上官，以刺时，遭忌斥，人咸惜之。《顺治志》

李日文 号穆吾，一作默吾。江西金溪人。万历六年，由进士知泾县。严明方正，人不敢干以私。重建明伦堂，及后堂、宾馆、察院，又移兑军仓于芜湖，置公署于郡中，皆捐俸为之。约己裕民，不事表暴。在任凡五年，擢工部主事。后十余年，士民建祠祀之，邑人赵健有记。《顺治志》

王 暹 字养明，号葛峰，江西吉水人。万历三年训道。少从罗文恭公游，问学深邃，动遵古礼，师范卓然。继之者：**卢应铨** 号仰苏，四川大昌人。由拔贡生任，坦夷文雅，捐俸济贫士，瓶无宿储，晏如也。继之者：**张继哲** 字克明，号小渠，湖

广麻城人。由拔贡生任。尝受业耿天台先生，读书谈道，充然自足，为文根极理要。士服其教，多兴起。《顺治志》

张尧文 字复吾，江西新淦人。万历癸未进士。十一年知泾县，宽和简易，而发奸摘伏如神。复水西书院祀田。岁连祲，经营赈贷，全活不下万家。迁南京兵部主事。《顺治志》 《江南通志》

陈大绶 号赤石，江西浮梁人。万历乙未进士，知泾县。清正不阿，民咸乐业，其所识拔士，多相继登贤书。岁侵，躬自入乡，多方劝赈，全活甚众。迁南京兵部主事，终尚宝司少卿。祀名宦。《顺治志》

何廷魁 字汝谦，号观欽，山西威远卫人。万历二十八年，由进士知泾县。时泾多显宦，廷魁强直自遂，相见惟长揖而已。寻调去，后为辽阳副使，殉节，赠大理卿，谥忠愍。《明史·忠义传》 《钱志》

李邦华 字孟闇，号懋明，江西吉水人。万历三十二年，以进士知泾县。下车未几，即尽悉民间奸慝，纤毫无遁形，不事威严，民自不敢犯，桀黠舞文之俗一变。暇则集父老问风俗、家产饶乏，靡不周知。戊申岁，大祲，按籍劝赈，全活者六万余人。立社仓，浚水利，兴学校，捐义田，靖剧盗，戢亡命，清惠最着。六年擢御史，崇祯末，以左都御史殉国难，赠太保吏部尚书，谥忠文。国朝谥忠肃，民立祠祀之。《明史·本传》 《顺治志》

曹谷 字愚公，号石仓，浙江秀水人。万历四十一年，由进士知泾县。风裁峻整，不怒而威。听断如神，诮者亦服。巡行乡曲，所过多题咏。暇则进诸生课文艺，而殿最之。擢御史。《钱志》

伍文渭 浙江人。万历间丞泾，清介爱民。凡因革兴除，任劳弗辞，功辄归令，令亦信委。初至邑，适有命案，委验讯，力白其冤，讼者感馈以金，正色却之。同寅谢某素贫，以解物诣京被累，厚助以偿。丞署敝，捐金创新，不烦公费。寻去任，泾民立碑迎春亭右。《钱志》

涂世叶 号岱麓，江西南昌人。万历四十七年，由进士知泾

县，擢南御史，有直声。《钱志》

叶天陞 号翼堂，福建莆田人。万历丙辰进士，天启三年知泾。县刑宽政简，清操不阿，迁南刑部主事。《钱志》

尹民兴 字宣子，号洞庭，湖广嘉鱼人。崇祯初进士，知宁国县，调泾县。泾征粮向催总户，不列细户，实欠者贿脱，已完者被拘。民兴专比的名，完即给串，粮易完而民称便。是时流寇渐炽，民兴筑城浚濠，多置火器，为守御计。考坑、白花、长枫、鸡子岭诸乡，剧贼吕大助、江楚王、汪天王等出没，为商民患。民兴令沿乡设堡，盗发则双槌击鼓，四方荷戈应之，民获宁。事见《泾政录》。在任八年，除奸厘蠹，有神明之称。行取入都，为陈启新所讦，降福建按察司检校，迁职方主事，进郎中。辅臣周延儒出师，为赞画坐累下吏，久之始释。福王立，起故官，论逆案，阮大铖不宜用。寻谢病归，流寓泾县。南京失，与诸生赵初浣等据城拒守。大清兵攻破城，初浣死之。民兴走免。唐王以为御史，事败，归卒于家。《明史》本传 《钱志》

莫天淳 号衷孟，华亭人。由举人为教谕，廉静慈良，弟子进谒，不问贽而问业，贫者返其修艇。外温内介，有秋水寒潭之号，又疏道士湖水，以朝学宫，文风一振。后迁仙游令，历刑部郎中，县人有《去思碑》，吴尚默记。《顺治志》

钟鼎 字凝之，浙江崇德人。崇祯十一年，由进士知泾县。慈和正直，却贿赂，革耗羨，省追呼，坐事当赴部质，邑民数千人叩两台请留，弗得，为之闭城罢市，断桥以厄其行。鼎泣谢去，行李萧然。民有裹粮随至山左及京师者，事得白。补宁国推官。国朝历官太仆卿卒。《钱志》

陈懋学 青浦人。崇祯间教谕，端严沈静，无忝师模，迁本府教授。《钱志》

刘士昆 号石渠，靖江人。崇祯间，以贡生为泾县训导，每与诸士言及古今忠义，辄慷慨淋漓。复启圣祠，建洗心亭，飭颓庑，修圯坊。迁湖广嘉鱼令，武昌同知。殉节极惨，士民哀之，为立祠。《顺治志》

高承埏 号寓公，浙江秀水人。崇祯时，由进士知泾县，沉

毅有威望。定践更，均邮边，革加耗，绝馈遗，讼简民安。泾人歌曰：“琴溪水，清且芬；昆山阜，青入云；谁其比，高使君。”擢工部主事。《江南通志》《钱志》

吴光义《寓公高侯去思碑》曰：县令，亲民之官也。县令贤，则民安，县令人人贤，则民历久而无不安。乃吾泾在万历朝，有贤令五人焉：盖金溪李工部日文，新淦张太守尧文，后先莅泾，予尚为诸生，寄籍无为州，先大夫守溪公，尝举以勖予，因心识之。若浮梁陈太仆大绶，大同何忠愍廷魁，吉水李忠文邦华，予与周旋久，皆大有造于吾泾者。自李忠文迁去，越三十余年，而得贤令秀水高君，古称召父杜母，无以过也。君生世阀，有文名，联捷南宫，自迁安调繁宝坻，皆以循吏著，功在封疆，玺书褒异。癸未九月忤权贵，再调泾。予闻报，手额曰：“泾幸矣！泾之人其获安矣。”君性凝重，慎取予，寡言笑，临事沉毅，有威望，人不敢干以私；顾意量和雅，冲远自镇，见者敬而爱焉。甫下车，自题其柱曰：“爱国若家，爱民若子，愿百里有乐土长城。敬上无谄，敬身无私，使寸心可青天皎日。”繇是施于一邑，上下洒濯，注厝裕如。凡利民者，罔不兴，病民者，罔不去。泾人歌之曰：“琴溪泉，清且芬；昆山阜，青入云；谁其比，高使君。”自荐绅先生及于妇孺，交口诵义，不可殫述。泾粮长四区轮充，区田分甲，有过数千亩者，有不及百亩者，乃当南北转运费竟相等，甚至将充现年预寄田于他户，他户将充又归本户，隐匿规避之弊，突如纷如。现年有力者，每提下甲田以益上甲，而下甲深无田可充之虑，其为民患久矣。君加意厘察，计通邑役田若干，十年一充，每年当得田若干。如某甲田溢于额，则裁之，以补额之不及者，某甲田不及额，即以溢者补之。纵田有分拨变卖，而年次轮及必仍归本户充役，着为例。驿递官马六十匹，计甲供马，不计田论甲，贫者大困。君令每田五百六十四亩有奇，畜马一匹，勒石垂久。泾故喜斗讼，恒历岁月不休；君念山民争气，难以威制，每庭质辄慰谕之曰：“公门殊不易入，汝更思之，欲罢犹可罢，不汝竟也。”其纤细者辄曰：“此何足烦官府，且归令汝父老议之，议而未当吾为汝治，未晚也。”讼

杀人者，多不以实，君恶之。每简验必先与约曰：“此非汝父兄即汝子弟，不有沉冤巨痛，而戮其腐骨，即与子弟弑父兄，父兄杀子弟者同律。今责认状不实，即反坐。”后遂衰息。君尤敏于决断，未尝滞日宿；辞理屈者，杖而遣之。罚醵自积谷备赈外，丝毫无所取。狱尝数月无囚，茶酒肆皆罢去，民呼为慈父。然发奸摘伏，下无能欺，吏人捧手累气與台之属，宁厚其糈。苟鱼肉小民，则置之于理，终君任，无一人以赃败者。君夙精九章法，出纳万亿，顷刻轮诸掌上，不爽铢黍，清核侵冒钱粮若干，以宽民力，终不见其持筹握算，时以为奇。君首尚文教，月之朔、望，大会邑弟子讲课学宫，且时集水西书院，而训之曰：“吾乡钱绪山、王龙溪二先生尊其师王文成公之学，所在辄为讲会，而泾之水西为尤胜。泾先达实相之，今与诸子约，其必以根筌性命渐深经术为务。”生儒翕然归化。君待邑博士有加礼，学谕周君泗，及前、后司训刘君士焜、丁君世麟、魏君勳、刘君守中，咸感遇自奋勤于启迪。丁司训卒于官，其子一阳贫甚，君厚赙以归其丧曰：“吾重师儒，正以敦士风也。”至若收赋，革加耗，岁时绝馈送，要人络绎，不饬厨传，日用薪蔬，俱给平价，又其绪余耳。闻三月十九日之变，君一恸仆地，久之始苏，遂力行备御法；不敛钱储谷，使家自积谷，不困民养兵，使人自为兵，镇静安详，屹然一方保障。虽泾介旌、太、石、青四邑之间，所在丛山大箐，堪为盗藪，诸邑游民，啸聚其中，慑于君之勇略，群不逞之徒，莫敢生心，厥功岂不伟哉！迁工部虞衡司主事，百姓相泣，如婴儿之失襁褓。乞留不得，谋建祠而尸祝之。君进诸父老谢曰：“一木一石，纤悉尽吾民脂膏，必不可。”诸父老垂涕受命，其行也扶老携幼倾城出祖，攀轅号呼，车輶不得前，君舍车徐行，一一慰劳之。诸父老随乡大夫士后，执辔者数百辈，君每为引满酒，逾百觞不乱。君在泾期年，饮止三爵，泾人无知其量者，至是相顾惊异。君复挥泪告语，升车而去。老幼伏地皆失声。越境百里外，尚有操壶浆为献，恋恋不去者。诸父老既重违君意，又难怒于怀，乃介诸文学属予志去思，遂忘朴略，综其治行，以垂来祀。君名承埏，字泽外，号寓公，浙江秀水籍嘉兴